



重刊元豐類藁序



毛古
愚藏



文章與氣運之隆替相關信不
偶然也宋興五呈聚奎文運大
盛然猶至於六七十年而後歐
陽公卓然以古文振起於天下
當是時又有如蘇老泉父子王
介甫曾南豐諸賢相與和之故

能丕變五代之陋上追西漢先
秦之古雅也斯豈偶然哉南豐
先生天資高學力超詣其所得
宏博無津涯所變則約守而恕
行之其言之而為文亦雄偉奔
放不可究極要其歸則嚴謹醇
正推其所從來實嘗師友於歐

公之門而其所自負則先正謂
其要侶劉向不知韓愈氏為何
如於戲先生所際如是所學所
行如是所從來所抱負又如
是其文足昌鳴世而並稱歐蘇王
曾四大家又豈偶然哉洪家食
嘗嘗觀先生元豐類藁於邑之

元氏欲手鈔之而未暇及暮則
已為有力者所取去矣其後官
游京師閱館閣雖有此書目而
其帙皆留玩於他所曰又竊嘆
不獨其文不偶然雖讀之亦不
可偶得也歲之四月洪疾得告
南歸過宜興訪友人鄒大尹益

旭宿畱累日為洪道其始得額
藁寫本於國子司業毘陵趙公
琬謀刻之繼又得節鎮南畿工
部左侍郎廬陵周公忱示巨官
本彼此參校刻梓成矣試為我
序之洪曰嗟夫是書之行亦豈
偶然哉有數存焉身蓋唐自韓

柳至宋三百餘年始有歐蘇王曾
曾出而繼之自宋歐蘇王曾至
今

大明又三百餘年矣而我

列聖誕布文命于四海亦八十年
於茲所謂文運與氣運正當會
合亨嘉之日也得無名世者出

且繼歐蘇王曾歟此先生之文
所自始於周趙二公而刻成於
大尹以盛行於世而為世學者
之楷範也豈復有區區不得讀
斯文之歎哉洪不能序斯文亦
有不待序而行者獨惟大尹之
刻本不為無補於世無功於學

者不可使其無脊也故忘其淺
陋為僭書此於篇端焉大尹名
旦益旭字也世為樂安故家知
礪山宜興二縣事所至多惠愛
及民而律已尤嚴若大尹可謂
賢也矣

正統十二年歲舍丁卯夏五月

辛亥

賜進士翰林修撰樂安姜洪序

重刊南豐文集序



南豐先生以文章名天下久矣異
時齒髮壯志氣銳其文章之慄驚
奔放雄渾瓌偉若三軍之朝氣猛
獸之挾^怒江湖之波濤煙雲之姿狀
一何竒也方是時先生自負要似
劉向不知韓愈為何如爾中間久
外徙世頗謂偃蹇不偶一時後生

輦鋒出先生泊如也晚還朝廷天
下望用其學而屬新官制遂掌書
命於是更置百官舊舍人無在者
已試即入院方除目填委占紙肆
書初若不經意午漏盡授草院吏
上馬去凡除郎御史數十人所以
本法意原職守而爲之訓敕者人
人不同咸有新趣而衍裕雅重自

成一家始予而爲尚書郎掌付制
吏部一日得盡觀始知先生之學
雖老不衰而大手筆自有人也嗚
呼先生用未極其學已矣要之名
與天壤相弊不可誣也
宋王三槐序

南豐先生元豐類藁卷第一

古詩

冬望

霜餘荆吳倚天山鐵色萬仞光銜開麻姑最秀插東極
 一峯挺立高崑崙我生智出豪俊下遠跡久此安蒿萊
 譬言如驛駟踏天路六轡豈議收駑駘巔崖初冬未冰雪
 蘇花入履思莫裁長松夾對蓋十里蒼顏殺氣不可迴
 浮雲柳絮誰汝礙欲往自尼誠愚哉南窓聖賢有遺文
 滿簡字字傾琪瑰旁搜遠探得戶牖入見奧作何雄魁
 日令我意失枯槁水之灌養源源來千年大說沒荒冗
 義路寸土誰能培嗟予計真不自料欲挽白日之西頽



嘗聞古者禹稱智過門不暇慈其孩况今虺人冒壯任
力強豈更餘纖埃龍潭瀑布入曾臆歎息但謝宗與雷
著書豈即遽有補天下自古無能才

一鷄

北風萬里開蓬蒿山木洶洶鳴波濤嘗聞一鷄今始見
眼駿骨緊精神豪天昏雪密飛轉疾暮略東海朝臨洮
社中神狐倏閃內腦尾分磔垂弓橐巧兔獍雞失草木
勇鷲一下崩其毛窟穴啾啾哭九子帳前活送雙青孫
啁啾燕雀誰爾數駭散亦自亡其曹勢殺空山竭九澤
殺氣已應太白高婦來襪莫載姐豆快飲百瓮行春醪
酒酣始聞壯士嘆丈夫試用何時遭

宿尊勝院

朝寒陟山祖宵雨集僧堂蔽衣蓋苦短客臥夢不長鳴
風木間起枯槁歎欲僵向來雪雲端葉下百仞隍起攀
蒼崖望正受萬慮戕歲運忽當雨我顏安得芳傳聞羨
門僊飛身憇蒼蒼誰能乞其靈相與超八方

苦雨

霧圍南山鬱冥冥狹谷荒風驅水聲祗疑日失黃道去
又見雨含滄海生如催病骨夜寒入似送客心哀思驚
揚州青銅不在照應有白鬢添數莖

里社

郊天社地君所重翦秸剗匏微得供秦皇漢帝陋古初

築時殊壇傾力奉年年屬車九重出羽衛千人萬人從
黃金日搜盡崖窟飛檣走筮華夷動馬蹄鳥一作路南村
有社里老邀神迎且送荒林破屋風雨入野鼠山狐狼
籍共何言茅箸古瓦甌稻飯豚蹄人得用

南源莊

床上不廢看青山門前便踏南澗路繞牆頓失車馬喧
岸憤日得滄洲趣嘗嗟秋蓬轉未有茆屋據對此耳目
新始覺精爽聚滄溟未可泛舟入鷹蕩誰能胝足去醫
閭在夷蛮羅浮苦煙霧子真自愛谷口家孔丘老亦洙
泗往吾能放意游八極此興久與前賢附悄然恠我忠
慮深已欲摧倒聞猿樹眼前了了破青坂屈椽小棟隨

時具野柔川深春事來筍饌暝夏青雲步秣田試犢耕
早風茗圃分籃摘霄露竹枝掃月散絺葛雪艇搜溪出
魴鱖帽塵便可臨水濯里閩何妨閉門拒介推毋厭俗
久思顛崖住不顧梁鴻妻亦高能快穿衣與藜茹成家
儻已嫁諸妹有立不憂吾弟孺攘攘天地間萬類殊好
惡歡合無一非睽窮有百悟吾獨安能逐毛髮飲泉食
力從所慕

論文

德操龐公林下時入門豈復知客主夷吾鮑紳貧賤間
分財亦不辭多取相傾頓使形迹空素定已各肝膽許
世間未信亦論文得失秋毫有乖忤

南軒

木端青崖軒慘淡寒日暮鳴鳩已安巢飛鵲尚求樹物
情限與奪茲理奚以據諒知巧者勞豈得違所賦又無
曾中憂頗識書上趣聖賢雖山丘相望心或庶

兵間

大義缺絕久未啣小人輕險何不至世上固自有百爲
兵間乃獨求一試趙括敢將亦已危李平請守那復議
叮嗟忍易萬人生冀幸將徼一身利

種園

於陵爲人灌園蔬我今園地不自種惰慵苟恃鄉井助
緩急孰與朋友共支離有疾上雖恕陳平不事家焉用

著書僅得一言利長者或許疇內訟

歎嗟

夜嘆不爲絲絡單書嗟不爲薇蕨少天弓不肯射胡星
揆捨久已墜朱鳥徐揚復憂羽蟲孽襄漢正病昭回杳
力能懷畏未足憂憂在北极群陰繞

寄孫之翰

孫侯腹載天下書崔嵬豈帝重百車伏羲以來可悉數
孰若自作何有餘更能議論恣傾倒萬里一瀉崑崙渠
誰爲曾中幹太極元氣浩浩隨卷舒昔未諫官對天子
何穢不欲親芟鋤不容乃獨見磊落出走並海飄長裾
孫侯風節何所似雪洗八荒看太虛親如國忠眼不顧

舊若張禹手所除歸來已絕衰貶筆進用祗調教倉儲
合持詩書白虎論更護日月金華居萬世根深固社稷
百季舊叟休田間素識孤生愛茆屋久將老母求山租
秋歸願事九江獲夜出未捲安豐漁孔明苟欲性命遂
孟子豈病王公踈塵埃未得見此樂太息一付西江魚

豪傑

老哺薇蕨西山翁樂傾瓢水陋巷士不顧無復問周公
可歸乃獨知孔子自期動即重丘山所去何啻輕糠粃
取合悠悠富貴兒豈知豪傑心之耻

俠荆

俠羸夷門白髮翁荆軻易水奇節士偶邀札數車上足

暫飽腥羶館中侈師迴拔劍不顧生酒酣拂衣亦送死
磊落高賢勿笑今羨養傾人久如此

黃金

陳侯坐收百戰楚呂氏行取萬乘秦田生立願開兩國
陸公微辭交二臣道旁白日忽再去囊中黃金如有神
何須首陽二夫子不是九鼎輸西鄰

揚顏

揚雄篡言准仲尼顏氏爲身慕虞舜千里常憂及門止
為山更欲一篲進小人君子在所蹈烈士貪夫不同徇
安得蠢蠢尚自恕百年過眼猶一瞬

橙予

家林香橙有兩樹根纏鐵鈕凌坡陀鮮明百數見秋實
錯綴衆葉傾霜柯翠羽沉蘇出天仗黃金戲毬相蕩摩
入苞豈數摘袖賤笔昇始足鹽梅和江湖苦遭俗眼慢
禁籩尚覺凡木多誰能出口獻天子一致大樹凌滄波

山檻小飲

變秋長雲豪洒雨北風壯餘燭尚爭威積晦頗異狀山
回擷楓顛屋立懸沆上飲檻聚石爲訶筵注溪當歡言
久誼譁罷興一怙悵旅人正飄飄豈得諧放蕩

胡使

南粟鱗鱗多送北北兵林林長備胡胡使一來太梁下
塞頭彎弓士如無折衝素恃將與相大策合副艱難須

還來里閭索窮下斗食尺衣皆北輸中原相觀歎失色
馬騎日肥妖氣麗九州四海盡帝有何不用胡蕃北隅
上翁嶺

放車秋崖望所得過舊聞初疑古軸畫山水秋毫分時
見崖下雨多從衣上雲濯足行上側心憂踏天文八荒
正搖落獨餘草木薰但覺耳目勝未知筋力勤顛毛已
種種世患方紛紛何當嘯吟此日與樵蘇群

雜詩四首

張陳貧時交干戈忽相逐范蔡憎嫌人卒自歸鼎軸害
奪怨爲欣利歐麥成戮世間不可料人事常反覆
日禪斷內討坐享七世榮霍光徇所愛兩亡家與名卓

關俱抗志纖微獨紆情得失萬世視長令壯夫驚
皇皇謁荆人心心遵陽虎及覺一礼亡翩然遂遠魯全
身有遜接直道無苟處故稱聖如龍屈伸茲可觀
揮袂謝出側騰身集崔嵬心胎太極氣手揚斗間魁荒
荆忽成桂螫鱗冬有雷君看九州寶自入朱門來

欲求天下交

欲求天下交試為滄海行風來冥冥內擺觸怪浪生突
兀萬里怒勢疑九州傾鯨鵬不自保况此一舟輕我徒
幸未即可留石根耕日將書上客共須天地清

冬暮感懷

荒山未有雪野水不見冰一臘今已半浮陽壯猶矜柰
此一歲除未有嚴氣升坐思空峒間負雪山千層雖受
凜冽僵愈此穢濁蒸感激崑崙祇一氣吹丘陵炎埃滅
無遺古色萬里與我病一洗濯懷抱失所憎因思大羽
獵屬車上凌嶒六軍騎皆駿爭先雪中登天時傾人意
踴躍士氣增大義雖不殺四方懾兵稜今此效安在東
南塞猶乘將帥色凋搞蚍蜉勢趨騰慘錯天運內止戈
信誰能

寄舍弟

新霖洗窮臘東南始知寒驚我千里意覺汝征途難空
江桂風席扁舟與誰安羈旅費亦久橐衣豈無單念汝
西北去壯心始桓桓竟逢有司惑斥走懷琅玕士固有

大意秋毫豈能干所憂道里困久無一罇歡我意生惻
惻為之却朝餐人生飄零內何處懷抱寬已期採芝藥
握手青霞端無令及門喜淹留雪霜殘

至荷湖二首

鐵色對我馬林林路南山草根已變綠水雪尚滿顏解
鑣蒼煙脚我栖就柴関垂時遭飄躑豈免生事艱夙意
待周孔此士豈可還濁醪且斟酌收心一餅間

悲風我眼澁酸狃我耳愁我顛水沒馬我起雪滿裘百
里不逢人豈有烟火投却倚青壁望白霧滿九州蒼蒼
運乃尔何地寬我憂夜卧夢成魘猶疑拔山秋

送徐竑著作知康州

漢蠻昔負命殺氣凌南州城郭漲烟火堂皇嘯蟬螭被
髮盡冠巾吾人反縲囚行剽至抄忽歸載越山丘駘攘
事雖定收合信瘡痍不有異澤霑何令餘患瘳寒風在
林鳴君馬不能留初佩太守章慨然任人憂問俗灰燼
餘咄嗟令人謀士材為世用因難乃知尤煩苛一蕩餘
幽遠偏懷柔四封鳴雞犬五穀被原疇里閭多娛宴歌
鼓震溟陬明義每所希古人不難侔日月有常運志士
無安輟山川自茲始努力千里遊

詠雪

北風蕭蕭鳴且歇短日悠悠生復滅朝含滄海滿天雲
暮斷行人千里雪初通壑谷氣先冷漸蔽郊原路疑絕

併包華夷德豈薄改造乾坤事尤謫驅除已與塵滓隔
灌溉終令枯槁悅相持始信竹相勁易敗可嗟萑蒿折
條垂巧綴如自愛管井隨形呀且缺飛檐轍轍駕長浪
巨壁林林倚精鐵弊文或有斷猶凍荒宴誰能耳偏熱
壯夫撫劍生銳氣志亡高門養高節已開襟曾絕煩憤
更足溝塍慰空竭雖無酒醴發朝笑亦有詩謠恣搜抉
新陽鬢鬢送鏡鑿舊控參差分曲折曲當展齒印崖石
徒倚長松看寥沈

寫懷二首

群生各有趣營慮自纏結名網智已羅利械愚所繼結
選主客真屬異兩興滅洗然大人意香與能者別不必條

蔓菜中自老根節曾非故饒培獨得較霜雪蛟龍無安
舟虎兕有危轍將能此人追得匪合明哲

荒城絕所之歲暮浩多思病眼對山湖孤吟寄天地用
心長者間已與兒女異况排千年非獨抱六經意終非
常情度豈補當世治幽懷但自信盛事皆空議氣昏繁
霜多節老寒日駛局促去朋友咄嗟牽夢寐將論道精
麗豈必在文字

茅亭閑坐

荆門常晝掩不必雲山深豈敢尚絕自能收寸心草萌
被遠徑鳥語遍喬林散帙味新趣鳴絃嘆餘音脫粟幸
可飽一瓢方獨斟顏徒緬雖卓非此誰爲尋盛服纏紫

艾重印鑄黃金信使憂惴息詎無勤苦侵埃塵緇冠蓋
霜露沾衣衿脅肩已自昔俛首微獨今豈誰智所拙曾
是力難任爲樂聊在此焉知玉山岑

靖安幽谷亭

橫江捨輕楫對面見青山行盡車馬塵豁見水石寰地
氣方以潔崖聲落潺潺誰爲千家縣正在清華間風煙
凜人心世慮自可刪况無訟訴囂得有觴詠閑常疑此
中吏白首豈思還人情貴公燁燁就玉班光華雖一
時憂悸或滿顏雞鳴已爭馳驩駟振鑣鏜豈如此中吏
日高未開閤一不謹所守名聲別妖姦豈如此中吏一
官老無瘵悵悵謀謨消泪泪氣象孱豈如此中吏明心

懽強頑况云此中居一亭衆峯環崖聲夢猶聞谷秀坐
可攀倚天巉巖姿青蒼露嫋爛對之精神恬一作可謝
世網艱人生慕虛榮歛收意常慳誠思此憂愉自應喜
榛管

青雲亭閑坐

一登此亭高負脫一蕪擁闢顏廣軒闢吹面驚飈動城
回石崖抱山亂寒湖湧谷草晚更芳沙泉細猶洶崢嶸
四封壯縹渺加氣捧連天廣衢走拂日長簷聳區區射
聲利浩浩奔蹄踵趨榮衆所便冒涉吾久恐緬想山水
宅環觀松檜拱屬耳天籟樂脫身人事冗幽閑味雖薄
放蕩愚所勇窮玄勢猶競殺伐聲更詢揚揚歛臣貴燁

燁官兵寵諒知草茅微無補社稷重牧放手幽鞭耕鋤
躬瘦隴尚或此心諧豈云吾道壅

南豐先生元豐類藁卷第一

南豐先生元豐類藁卷第二

古詩

寄子進弟

憶子去家日南風始吹衣今來日未幾蠅蚊已群飛思
子兼晝夜何啻如渴飢喜聞遠客至手自排荆扉客送
書一紙翰墨子所揮上言山居惡夢寐接庭闈次言服
畎畝禾黍廩已肥其餘業文字頗側隱與微題詩在紙
尾語老意不非我喜何所似大似客得歸我與子事親
未飽藿與薇常若去左右辛勤治鞍鞵子行何時反我
眼日已晞應須畢秋刈相見慟依依

喜寒

純一作陽四時行無復氣節勁日火相吐吞乾離力還
併玄冥失所安惟怯擅操柄我行東南野憤憤若酣營
喜逢青林長葉蔓可翮映正嗟天之高玉色萬里淨忽
驚西山雲毫末生一鏡湏臾油然合點滴飛雨迸颼颼
漸相扶霽霈一何盛積陰類潛師形勢久已偵乘時出
幽墟奮發精爽競亘天逐炎官顛面修火令威加乾坤
從冽冽氣貌正人無焦煩憂冰釋天下病豈湏雪包林
已壓朱鳥橫南方天精兵瘴濕災可屏爭難奪刀及發
巧搜壑穿收功當在今殺伐順天政況云楚麥祥已竟
閭里慶高歌叩吾轅上頌天子聖

詠史二首

京室天下端飛薨無餘地國士憂社稷塗人養聲利貴
賤競一時我冠各鱗次子龍獨幽遠聘召漠無意
子雲無由歸挽首天祿閣君平獨西南抗顏觀廖廓無
猜到沉寔有故驚寂寞實用心豈必殊拘肆事終各

江湖

江湖俗畏遠幽好自相宜論迹異驚衆辭囂如避時優
游可以享薇蕨易為私胡然弃回懼霜雪有驅馳

將之江淞延祖子山師柔會別飲散獨宿孤亭

遂書懷別

蜀客向何處欲觀浙江潮擬舟吳門柵况會故人招置
酒吳亭上無人吹紫簫浩觀萬物變馳尔生涼颼遂恐

時節晚芳蘭從此凋功名竟安在富貴空寥寥
寒鳴鶴舉千里鸞鳳翔九霄胡為蓬蒿下日夜悲
鷓鴣車馬夕已還行人亦飄飄浩然滄海志寂寞
守空宵

詠雪

巖巖層冰寒川澤洶洶北風鳴木石黃雲半夜滿
千里大雪平明深一尺兩儀混合去纖間萬類
齟齬歲歲絕塵迹蛟龍岌起抱崗岵江海橫奔
控阡陌野林縹渺苦難狀庭對鮮妍疑可摘開
門更覺山市靜散帙偏宜紙窓白精光蕩射徧
巖谷氣象崢嶸見松柏少年登望就臺觀壯士
衡凌向沙磧飢鼯嗥卧伏牙爪獵隼飛挈矜羽
翻旂簷客聚湍幽在桑經人行沒雙屐高堂暖
熟厭羅綺自駕疲牛理燒塿

答裴煜二首

拙者羞強合因成杜門居豈知公相尊一室若
有餘慶子富文行顧為已不如所以子之黨類
見我僕車歡誠激孤緒合若水縱魚新詩八十
言筆端產璠璣屑屑委地蓬清風為吹噓相期
在規誨庶以輔頑踈

寥寥今非古感激事真妄曾誰省孤心祇以餌
群謗參差勢已甚決起意猶強親朋為憂危議
語數鐫蕩久之等聾聵兀矣坐閭巷長嗟貧累心
更苦病摧壯微誠豈

天與今晨子來貺頽慙小人愚未出衆夫上狂言屈子
吟浩歌仍子唱相歡匪貌濟所得實心尚時節雖已晏
梅柳幸秋放過後勿厭倦相持非鬱盛

寄王介卿

憶昨走京塵衡門始相識疎簾掛秋日客庖留共食紛
紛說古今洞不置藩域有司甄棟榦度量弃樗櫟振轡
行尚早分首李壩北初冬憇海昏夜坐探書策始得讀
君文大匠謝刀尺周孔日已遠遺經竄墻壁倡佯百怪
起冠裾稔回慝君材信魁岷議論恣排闥如川流渾渾
東海為委積如躋極高望萬物著春色寥寥孟韓後斯
文大難得嗟予見之晚反覆不能釋胡然蘊環堵不收

謀者惑明朝渡江還念念非可抑如醞冒炎暑每進意
愈塞維時南風薰木葉晃晃繁碧頹雲走石瀨逆坂上文
艦欣聞被檄來窮閭駐鑣軾促榻叩其言咸池播純繹
行身抗淵嶺及物窺龍稷綢繆指疖病攻砭甚鍼石淺
止有停沙亦可洗珠壁論憂或共嘖遇愜每同蟄正祝
融橫金隅未提職高樓豁可望命載屢攀陟一不羅俗
嬉怡然治紈墨露注尚忘疲更得蟾蜍吳雅愛張與余
挽之置茵席群兒困不酬吽嘖聚譏摘仁義殊齟齬味
者尊惡音石一石路霧草亦衰黃吟蛩鬧朝夕君子畏簡
書薄言逆行役商歌孺子別失淚染衣襟自從促權去
會此隆冬逼何神鼓陰滿萬竅動諠傲城顛睨江浪蛟

恠助掀射仁賢保無恙所想挂驚惕燁燁多更從良已
鑽藜齏迨茲尺書至疑念始冰析蘭消沓慈祥筠梧肆
諧適續紛衆胥士畧壘各嬉息其餘書牘背栗密縷棧
織卷書勞來翰寸懷良士懌野泊轉平綠梅梢弄繁白
金緇引柳萸芳氣滿原澤出門無所抵歸卧四楹寂術
學頗思講人事多可測含意不得發百憤注微臆搖搖
詠顏色企足閑途隔自漸兒女情宛轉抱淒戚吾念非
吾私何當託雲翼奇偶轉如輪終期接焦溺

上人

金節橫光馬珂開瑞鷲宮袍膏玉繞烟沙輕輓高軒過
路上千人瞻羽蓋瑤魁精彩浮蒼龍江城四面生春風
城中壞屋書籤碧有客苦吟連旦夕麻衣塵暗抱書泣
歲暮黃梁不供食白日曛矓望龍坂坐上一言寒口暖
西入天關洒霖雨須惜窮鱗在泥土

初夏有感

我從得病臥閭巷三見夏物爭滋榮紅英紫萼逐風盡
高幹密葉還陰成山亭水館處處好朱碧萬實相駢擎
林烏梁燕各生子翅羽已足爭飛騰雉鷄五色繡新翻
鷺鷥慕匹相隨鳴穴蜂露蝶亦有類歛往復聚何翔輕
箔蚕滿室事方盛繭綴下上如連星麥芒秧穎錯雜出
高壠大澤填黃青物從草木及虫鳥無一不自盈其情
嗟我獨病不如彼曾氣卧立常怳怳筋酸骨楚頭目眩

強食豈得飢膚盈我身今雖落衆後我志素欲希軻卿
十年萬事常坎壈奔走未足供藜羹愁勤未老鬚先白
多學只自爲身兵自然感疾憊形骸後日雖復應伶俜
非同世俗頽顏色所慕少壯成功名但令命在尚可勉
胥細詎足傷吾平

送人移知賀州

溪石膠船秋瀨微南山巉空勢嵯巍風露氣嚴花草緋
天色濛濛初鴈飛君子往守東南圻旗旒綵錯如翔暈
象齒照地榮笏衣先後隸從何頎頎初君治縣參德威
吾人溷濡樂以肥念今奪去失所依出者遮行居者希
我思群公坐天園心與星斗爭光輝薦賢絀否言無違
迅若發石乘高機何此茂器時所稀噤無一語為發揮
敢作此什傳王畿且暮重書未勅歸

之南豐道上寄介甫

應逮冒煩暑驅馳山水間泥泉沃涸肺沙風吹汗顏疲
驂喘沫白殆僕負肩殷仰嗟早雲高俯愛芳陂潏空郵
降塵榻淨館排霞闕城隍壯形勢岡谷來回環紅芰姹
相照翠樹鬱可攀野苜雜青黃雨露施上慳巫覡謁群
望簫鼓鳴空山憂農非吾職望歲竊所歎憇當午日烈
行瞻月初彎星斗弄光彩羅絡龜火班跋履雖云倦桑
梓得暫還林僧授館舍田客扳鞍鞵吾心本皎皎彼詬
徒額額方投定鑑照即使征馬班相期木蘭楫蕩漾窮

灣川

謝章伯益惠硯

人生對門東西陌口耳一間心誰傳况乃天地相去遠
一在南海一在燕古今萬世復萬世彼亦居下此在前
是非得失錯且繁以情相語何由緣造化豈不大且淵
到此縮縮智且慳聖人智出造化先始獨俯仰吾坤乾
一人詰曲意百千以文寫意意乃宣簡書軸載道相聯
馳夷走貊通百蠻羲皇向今谷屢遷言語應接旦暮間
聖人不死一作能術以此又與其類殊蚊蠕外之君臣內
父子仁義札樂定筆端硯與筆墨乃舟船論功次第誰
能攀伯益於文敏且顯字向紙上生戈鋌與硯出入宜

不捐胡不贊我登弃泉作詩知硯功小大報不充賜心
焦然

送劉醫博

小人久病如愁感每嘆地僻無良醫窮居索寞餘事少
對坐荏苒風光移深冬山城萬木落陰氣蕩射生寒颯
東方吐日光入戶素壁閃閃含清輝臨汀劉君落落者
六伎絕偉如天資潛心密與造化會布指復有精靈隨
馬蹄所至病歷屈我於此時忻得之一來握手與我話
委曲哀旺肺與脾囊中玆丸撮星斗俾我咀嚼心顏怡
洒然沉痾一日解始免未老為枯骸越人前臆術已緩
仲景納餅術可卑劉君與我德至大拱壁巨鼎非酬禪

我嗟劉君乃士類進退婉婉無瑕疵况又新承太守薦
羈鞅日背東門馳禁林侍從務周慎君挾所有直相宜
貴人四難真可患去此足以爲時規

送陳商學士

柳黃半出年将破溪溜浸苔強萬箇溪頭蒲葦各萌芽
山梅最繁花已墮物色撩人思易狂况躋別館看何那
城東日晚公將去熏影未離愁四座公於萬事不彫鐫
心意恢恢無坎壈來從奎壁光鉅下矣倚樽筵成郡課
嗟予齷齪才性下弃置合守止樊餓公持姓名動人主
後飾寧嫺筆端挫從今清夜思江路夢送公船先北過

送錢生

天下李校農師生無所依子來滿囊書瓌瓌壁與璣一
字未得讀叩言忽言歸怜子甚有志事時與子違吾無
一畝官留子爲發揮去矣善自立毋使嗣音稀

雪詠

雪花好潔白不待詠說知區區取相似今古同一辭
能比衆作小去筆墨畦誰能出千載爲雪立傳碑四座
且勿歌听我白雪詩天地於降雪其功大艱難去年暖
風日冬在春已還山屏盡深碧危溜聲亦潺草萌各已
動梅花開寂繁鑪火殆可謝衣絮誰復言推排臆已過
一變天更寒飄風動木石激射難出閤深房擁高燎領
肘曾不温仰視雲壓疊垂欲藉屋山元氣不復呵飛鳥

折羽翰誰排河漢流欲墮莽蒼間道為黑風遮疑凍無
住者紛紛成片縷六出非刻削初時漏餘滴雜雨猶可
惡迤邐縱飛洒態狀不可名或稀若有待或密似相縈
或弱久宛轉或狂自騰群來信汗漫孤飄亦零丁屋
角初漸班瓦溝忽皆平坳窪一已滿茅茨壓將傾樹木
遍封裹岡山助崢嶸坳隄斷纖穢池臺有餘清流塵寂
已掩物象皆明厨煙或中鏡里表仍孤孽長街隱缺
甃荒城混孤稜沙水眇相合扁舟在曷屏咏草鳥雀梁
篆字遺裝橫頓驚宇宙內侈麗皆天成引望誰倚樓秀
色亂目睛未懷衡門士辛苦守六經山藜不充腹筆硯
久已冰柔茵坐中堂誰問公與卿世事汨無意燭換猶

飛觥文犀豎朱箔陽春謝纂筆所處殊處所苦樂固異
情誰致此不齊上天意何營蒼蒼不可問奕奕洒來停
明晨起相處寒日已滿窓井甃破圓素砌苔還故蒼萬
物去復冒顏色皆復常融為大田水其流日滂滂方塘
接深叻澄徹碧玉光豈惟癘疫消庶驗百穀祥願彼守
經士幸可繼糗糧憂民既非職空致新詩章

送僧曉容

飛光無停芳歲闌群陽不行寒氣動踈篁有韻窓含雪
重幕無溫筆樓凍蕭條山草葉始枯綽約江梅蕊先弄
無人為我取酒斟有客來前乞詩送多情為客不能已
捲紙連書筆鋒縷七言百字拙且卑俗眼方憎汝休重

送叔延判官

北風吹空雪花冷平鋪雲濤冒峯頂江長水濶飛鳥絕
沙樹參差動波影君子從戎碧油下綠髮清瞳笏袍整
大馬高車府中罷一船沿流背丁丙魴魚勝銀罇酒美
物物當前若圖屏危帆健櫓醉中去千里奔過猶一頃
明年隨春到京國紅紫燒空折桃杏獻書又謁蓬萊宮
新斷豪曹試鋒穎况遇朝廷方急材驥駉駉足當騁

山茶花

山茶花開春未歸春歸正值花盛時蒼然老耐昔誰種
照耀萬朶紅相圍蜂藏鳥伏不得見東風用力先吹噓
追思前者葉蓋地萬木慘慘攢空枝寒梅數綻小顏色

霰雪滿眼常相迷豈如此花開此日絳艷獨出凌朝曦
為憐勁意似松栢欲攀更惜長依依山榴淺薄豈足比
五月霧雨空芳霏

丁亥三月十五日

茫茫月色如溪沙萬里不有纖雲遮今年寒氣爭春來
雪大如掌隨驚雷臨川城中三月雨城東大丘汨為渚
天地慘慘無開時常恐蟄死和與羲此時謂月水中沒
溺入蛙腸那復出豈知今夜月光圓照徹萬物無遺偏
人間有人司重輕安得知汝有時明

舍弟南源刈稻

買田南山下禾黍忽已秋糟床待此注豈止夜食窮陰

迫霜霰不可遲擊收吾黨二三子晨行已寒裘久苦城中囂至山諒優游况已除險穢新堂置崑幽窓軒衆峯出階墀水淙流良材未成種草樹亦已稠寒花開照耀谷鳥樂啾啁心與珍境接佳興固已適而况饋朝夕甘美日可搜黃鷄肥落俎清醑湛盈甌時鮮鱠水鯽餘滋折丹榴此味何以侑文辭頗賡酬晝務誠遺滯夜工督春諭因觀稼穡勞始覺奉養優此樂詎非幸人生復何求送子因自起徃意不可留

奉和滁州九詠九首 并序

先生貶守滁滁小州先生為之殆無事環州多佳山水最有名瑯琊山近得之曰幽谷先生數遊其間又賦詩

以樂之輩得而賡之者凡九章

瑯琊泉石篆

陽水絕

藝天下稱瑯琊石篆新有名初留泉涯俗誰顧

一日貴重繇先生古今書法不可數猶有字本存於經

我於八体未曾學雖得此字寧能評高文老筆又所愛

欲叙髣髴辭非精筆端應驅鬼神聚筆妙復與陰陽爭

刻雕萬象出冥昧不見刀斧曾經營奇形挺若聳崖巘

陰勢直恐生風霆雨未萃蒼龍蛟起秋入窠沉星斗明

先生七言載其側為地自與丘山平先生抱材置荒郡

有若此字存崑高當還先生坐廊廟悉引萬事歸繩衡

遂收此字入秘府不使日灼毒苔藓高材重寶不失一

唐舜湯禹寧非朋

遊瑯琊山

飛光洗積雪南山露崔嵬長淮水未綠深塢花已闌遠
聞山中泉隱若水谷推初誰愛蒼翠排空結樓臺轆轤
架梁棟輝輝刻瓊瑰先生亦鳥鳳姿未免燕雀猜飛鳴失
其所徘徊此山隈萬事於人身九州一浮埃所要挾道
德不愧立與回先生逐二子誰能計垠崖所懷雖未寫
所適在懽咍為語幕下士殷勤羞薤醅

歸雲洞

洞遠人言接滄海洞幽晴始見莓苔天下顛顛望霖雨
豈知雲入此中來

瑯琊溪

野草山花夾亂流橋邊旌旆影悠悠即應要地無人見
可忍閑時不出遊

班春亭

山亭嘗自絕浮埃山路輝光五馬來春滿人間不知主
誰言鑪冶此中開

度子亭

瑯琊石泉清照人裏無泥沙表無塵風翻日炙夏潦盡
古練一匹常齋淪

右屏路

石屏不見刀斧痕石下初誰得行徑千騎來時停管絃

月明更覺山中靜

慧覺方丈

七言老意蒼松蟠百金古字青霞鑄儒林孟子先生是
墨者夷之後代傳

幽谷晚飲

先生卓難攀材真帝王佐皎皎衆所病蜿蜿龍方卧卷
彼天下惠赴此一郡茅幕府既多暇山水乃屢過旌旗
拂象密車馬驚坎壈此谷中泉聲響遠已播槎橫勢
逾急雨點綠新破旁生竹相圍竦竦碧千箇遙源宮雖
窺盤古坦如磋遊鱗戩可數飛鳥嬰相和按琴薰風後
結宇寒崑左航筵已得月金紈尚圍坐心如含道暹語

不綴招此一時聳傳觀千載激柔懦甘棠詩之懷峴首
淚嘗墮况此盛德下襦袴人所荷不俊碑刻垂棟牖敢
隳挫當今甲兵後天地合坎壈先生席上珍豈忍溝中
餓母徐黑轡石當馳四方贊

南豐先生元豐類稿卷第二

元豐類藁卷第三

古詩

游麻姑山

軍南古原行數里忽見峻嶺積千尋誰開一徑破蒼翠
對植松柏何森森危根自迸古崖出老色不畏莓苔侵
脩竹整整儼朝士下蔭石齒明如金遂登半嶺望城郭
但見積靄縈江潯兩陵稍轉露樓閣沙莽忽盡橫園林
秋光已逼花草歇寒氣深我馳輕輿豈知倦
倏忽遂覺窮巖峯龍門誰來此中鑿玉簡不記何年沉
泉聲可聽真衆籟泉意欲瀉無瑤琴斗迴地勢平如削
穠稂百頃黃差參橫開三門兩出路却立兩殿當崖陰

深廊千步抵崑腹桀木萬本摩天心碑文磊菟氣不俗
筆畫縹緲工非今世傳僊人家此地天風冷冷吹我襟
今人豈解不老術可恠綠髮常盈簪根源分明我能說
一室傾里輸瑯琳相高既不擁耒耜方壯又不持戈鐔
我丁軫軻豈暇議直喜虛曠開煩襟清謠出口若先搆
白酒到手無停斟山人執袂與我語留我饋我山中禽
玲瓏當窓急雨洒窈窕隔溪孤笛吟未昏已移就明燭
病骨夜宿添重衾神醒氣玉目無睡到曉獨愛流泉音
起來身去接塵事片心未省忘登臨

桃花源

來時秋不見桃花空對寒泉澗石涯爭得時人見鸞鳳

不見身去憶烟霞

丹霞洞

麻姑石壇起雲霧常意已極高峯巔豈知造化有神處
別聳翠嶺參青天長松桀栢枝鬼阿中畫一道如流泉
林風颼颼滿丘壑山鳥朝晰凌飛烟山腰古亭豁可望
下見秋色清無邊忽驚陰崖勢回合中抱幽谷何平園
初誰鑿險構樓觀更使遠舍開芝田令人到此毛骨醒
欲搆老筆丹青傳羌夷干戈合未解天地瘡痍誰能痊
大厦棟梁置沙莽肯復顧眄擁與掾吾徒於時直何用
欲往未得心茫然

半山亭

樹杪蒼崖路屈盤半崖亭榭午猶寒平時舉眼看山處
到此憑欄直下看

顏碑

碑文老勢信可羨碑意少缺誰能鐫已推心膽破姦宄
安用筆墨傳神仙

碧蓮池

神仙恍惚不可明空有池蓮變紅碧清香冷落扶風前
似被麻姑妬顏色

流杯池

行盡壇前石崖路忽見一曲清冷泉酒行到我不辭醉
安用了了分愚賢

七星彩

古杉蒼蒼橫斗文其幹十圍陰蔽野應到夜深山月來
林色天光迷上下

瀑布泉

飛泉一支天上来寒影沉沉瀉龍穴山靈欲以恠動人
山路先冬積霜雪

秋懷

天地四時誰主張縱使群陰入風日日光在天已蒼涼
風氣吹人更慘慄樹木慘慄顏色衰鶯雀啾啾群侶失
我有愁輪行我觴顛倒回環不能律我本孜孜學詩書
詩書與今豈同術智慮過人祇自讐聞見於時未裨一

片心皎皎事乖背衆醉冥冥勢凌突出門榛棘不可行
終歲蒿藜尚誰卹遠夢頻迷憶故人客被初寒卧沉疾
將相公卿雖不爲消長窮通豈須詰聖賢穰穰力可攀
安能俯心爲苟屈

送歐陽員外歸覲滁州舍人

病卧不出門非閑避塵土深秋影雖清孤懷共誰語辱
子問吾廬輝如就賓廡足音固可喜况久擬松麈子生
何其祥家庭坐軻愈顧我齒諸生漸磨苦頑魯如有仰
天潢勢豈識津渚又若馬牛然安能望熊虎冗拙在門
心常若風中羽 羨子筋骨輕歸飛得其所從今夢無南
隨子渡江舫

一晝千萬思

一晝千萬思一夜千萬愁晝思復夜愁晝夜千萬秋故
人遠爲縣海邊向踐州故人道何如不問孔與周我如
道邊塵安能望高丘又若澗與溪敢比滄海流景山與
學海汲汲強自謀愁思雖爾勤故人得知否

送鄭秀才

鄭生雙瞳光欲溢我意海月藏其中齒清髮紺心獨老
秋崖直聳千年松未趨學宮業文字進退珮玉何玲瓏
一朝東書別我去馬蹄脫若風中蓬當今文人密如掃
子勿浪漫西與東處身不可不擇處一跌萬里無還蹤

答所勸炙

矣灼君所勸感君書上辭勿難火艾痛要使功名垂我
道世所背君知餘有誰筋骸倘且健學行肯教隳

菊花

菊花秋開只一種意遠不隨桃與梅遊人有幾愛孤淡
零落野水空崑隈層層露萼間枝葉金罍萬箇圍蒼苔
直從陶令酷愛尚始有我見心眼開為憐清香與正色
欲舉更惜常徘徊當携玉枕就花醉一飲不辭三百杯

荅石秀才月下

今宵月色明千里秋水與天無表裏樹木矯矯蛟龍蟠
屋瓦鱗鱗雪霜洗林下病人毛骨醒目愛清光不知已
秋風自作箏籟聲更送城笳夜深起客衾初寒睡未能
忽得子詩哦以喜子求我和何勤劬我知苦踈少知己
子真愛我常存心安用蕪穉煩紙筆

冬曉書懷

群鷄啁晰天始明東方吐日霜上冰長簾高褰掃落葉
短杙背立吹殘燈昔時氣銳過奔浪今日病減真無蠅
南箕翻翻世所効白壁皎皎誰非憎屠龍破產習已妄
畫蛇著足棄未能不容當時孔何病更譽衆列額非朋
坐知天下書最樂心縱塵土酒可憑莫過二事賢且聖
胡不學外常騰騰

代書寄趙宏

憶承昨歲致書召遂入江城同一笑羸奴小馬君所借

出犯朝寒鞅頓掉從來萬事固已拙况乃病數頽不少
去隨衆後已自枉更苦世情非可料一心耿耿浪誠直
百口惓惓競訶誚獨君踴躍於我顧譬於真玉火空燒
別未未幾歲云換楊柳得春還窈窕東溪最好水已綠
桃李萬株紅白照當時病卧不能出日倚東風愁同調
逶迤紅白委地休新葉可書陰可釣君持使傳入南師
忽領貌貅過蓬藿僧堂取酒就君飲不覺乘權盞頻醜
屋西明月過簾白簾角有時飛熠燿明聞鉦鼓催軍發
共上高樓看旗旄日高行忽又別君從此閉門誰可嘯
秋風已盡始得書喜聽車輪返窮微身欲追隨病未能
目斷珊瑚透海嶠是時肺氣壯更惡日以沉溟憂不瘳

豈其艱苦天所憫晚節幸值巫彭妙放心已保性命在
握手猶驚骨骸峭今年霜霰雖未重室冷尚無薪可燎
一一酸寒豈易言局促不殊魚在罟勞君書劄數問訊
深愧薄材無象肖君心卓犖衆未識安得辨口聞廊廟

東津歸催吳秀才寄酒

荒城懶出門常掩春氣欲歸寒不歛東隣咫尺猶不到
况乃傍溪潭石險風光得暖才幾日不覺溪山碧於染
欣然與客到溪岸衣憤不避塵泥點谷花洲草各萌芽
高下迸生如刻剡梅花開早今已滿若洗新粧竟妖臉
柳條前日尚憔悴時節與催還在葦沙禽翅羽亦已好
爭趁午暄浮翠歛從今物物已可愛有酒便醉情何懶

君厨山杏舊所識速致百壺須灑灑心知萬事難刻畫
惟有醉眠不忝預愁醕酌苦太熱已令洒屋鋪風簾

送吳秀才

一年過臘已十日餘日到春能有幾春來遠近不可問
冷碧先歸在流水梅花向今獨已繁玉艷都占春風間
草萌出土亦過寸衆芳次第掛清寒虛堂盡日對風影
我獨此守青瑯玕故人遠來未一醉車鞅欲去令誰攀
憐君滿腹富文綵倦尾赤色無波瀾連年禮部試多士
白羽捨置操捺管君今忽忽負壯節我亦春色羞衰顏
况逢離別可柰何憶人日老情日多

和章友直城東春日

東流抱孤城雨洗見春色風吹百草根道路千里碧莫
盡溪漫漫去波瀾散無跡遥林缺見山冉冉蒼藹積沙
禽有遺蹤文字不可識青松對桃李桃紅李花白勢方競
青青守崑側君意無不諧研談欲俱得賦詩多所陳炳
若觀龜拆城東不待到衆物已歷歷

簡如晦伯益

一年孟春月已晦思去去臆如須更春事競在二月間
急景豈與正月殊今看桃李花未出不知花開能幾日
日尋堯李不暫停恐未十四花已失筋骸縱病心尚壯
酒醴雖無隣可乞城東欲與君試行莫嫌冷落逐書生

高松

高松高干雲衆木安可到湯湯鳴寒溪嫵嫵倚翠壽懸側
聽心神醒仰視日晴眺風雨天地動一葉不欹倒豈同
澗中萍上下逐流潦豈同墻根槐卷卷秋可掃鳳凰引
衆禽此木陰可壽吾求百常柱星日此可造般世有
無方鍾野人好

青青間青青

青青間青青盡望密如罽風柔聲自和草蓍陰可藉
蜂不暫去啼鳥時獨下繚牆隔深園高枝出虛榭貴人
無餘事歡言持玉斝茅屋亦自好吾廬四如蓋故人儻
可遲倒屣不辭逐

洪州

洪州城中荒且遠每到弱馬常驅馳交朋顧我亦已厚
謝詞有禮寧當違人生有累乃汲汲萬事敦迫如嚼蠶
山中無塵水青白安得去吟梁甫辭

詠史二首

仲尼一旅人吳楚據南面不知千載下究竟誰貴賤賜
也相國尊子思終不慕乃知古今士輕重復內顧

沂河

客舟沂河西北行日夜似與河流爭不知洶洶竟何為
愔意彼此何時平但疑天地送秋至惡雨疾風相觸聲
我病入寒饒睡思歸夢正美還遭驚東南水鄉我所住
楊花散時春水生湖江渺邈不見岸汨汨自流無可憎

石泉百丈落山背此縱有聲清可聽莫如此水極凶驚
土木暫觸還轟轟吁嗟造化何厚薄惡物受稟無由更

尹師魯

衆人生死如塵泥一賢廢死千載悲漢初董生不大用
厭政自此慙隆姬至今董生沒雖久語者爲漢常嗟歎
尹公素志任天下衆亦共望齊臯伊文章氣節蓋當世
尚在功德如毛釐安知蔓草蔽原野雪霰先折青松枝
百身可贖世豈惜計告四至人猶疑悲公尚至千載後
况復悲者同其時非公生平舊相識踈向北極陳斯詩

發松門寄介甫

南風夜發吹孤舟起視北極星辰稠曉開征帆破長浪

挾以兩艣當中流松門東面見廬阜其上少日煙氣浮
舟人指我極四望黑處無底蛟龍湫櫛溪左蠡信浩蕩
兩涘若粒分岡丘落星困困孰可狀清漢夜獨垂牽牛
故人曾期此同載捨權直抵雲山游念今五載負斯語
心獨動蕩風中存况聞肥遯須山在早時事力胡能謀
所嗟親老食未足安得一畝操鋤耰此言此笑吾此取
非子世孰吾相投今諧與子脫然去亦有文字歌唐周

北風

北風動地江翻天我坐極浦維空船浮雲溟溟下無日
老樹自擺相樛纏薰琴空聞不可見應已久絕朱絲絃
遂令陰飈自回斡安得歲物無疵愆江頭酒賤且就醉

勿復著口問陶甄

過彭澤

淵明昔抱道為貧仕茲邑愔然復謝去肯受一官繫予
觀長者憂慷慨在遺集豈同孤蒙人剪剪慕原隰遭時
乃肥遯茲理固可執獨有田廬歸嗟我未能及

江上懷介甫

江上信清華月風亦蕭洒故人在千里樽酒難獨把由
未懶拙甚豈免交游寡朱絃任塵埃誰是知音者

讀五代史

唐長匪一日遠自開元中尚傳十四帝始告曆數窮由
來根本強暴戾豈易攻嗟哉梁周間卒莫相始終兵無

系世德滅若燭向風當時積薪上曹每慶歌鍾

庭木

庭中有佳樹清影四面垂往往風雨夜蛟龍此按依留
之待鸞鳳未許燕雀窺誰謂鳥身惡安巢最高枝不顧
白日照直傍陰虹飛自恃棲託穩豈憂彈射危三春獨
翱翔百鳥歛羽儀鳳凰不能爭况乃鳧雁微既務志意
得都為世可欺白晝攫鼎肉從容擇牲犧近人不肯避
一怒終夜啼遭其瞰牆屋禍患豈可移聽之欲占赦婦
人固已癡忿害乃其所何肯報福釐行路指之嘆童稚
爭罵譏鸚鵡獻至尊言語固可竒翡翠輪太府詭服所
取資雉鷄美文章贊贈理亦宜鷹鷂逐惡鳥天威得施

爲閔睢於周室取絜配后妃莫如此鳥頑飽食無所禪
一善不能有醜聲日交馳但知扣嘉慶巍然治其栖衆
怒未易忽微幸亦有斯安知無刀斧崩分弃毛皮且勿
計靈靈使樹心本坡亦有愛博擊鉤連梟與鴟亦勿樂
順已窟穴藏狐狸凡能致大患豈不自毫釐未知引避
去此語足自規惜哉種樹意長與事垂遠古來亦如此
壯士徒嗟悲

發彭澤

卧聞榜聲和雨來起見江流與天合山回風吹霧不蓋
帆健船衝浪相沓歸雲難乘望空斷落日乍掩涼可納
去家今夜一千里誰見愁未坐方榻

菊花

東籬菊花今已開萬物各自相驅催却尋桃李那復有
舊樹慘慘空牆隈年光日日已非昔人世可能無盛衰
朱顏白髮相去幾勢利聲名相抑排三公未能逃餓死
九鼎竟亦爲塵埃乃知萬事皆自在有便只宜持酒杯

落葉

秋雨與風相噴薄樹木可能無葉落琅玕散漫不可收
野步滿船誰掃掠垂楊千樹舊所惜顏色易衰由力弱
空條尚舞不自休物意豈能知索寞菊花雖開能幾許
新酒縱酸猶可酌朱顏久已拚銷滅豈有功名堪寫兒
衣冠塵土欲更洗其柰滿隄河水濁花開葉落須強醉

壯士豈憂常落魄

舞鶴

蓬瀛婦未得復翼清溪陰忽聞瑤琴奏遂舞玉山岑舞罷後嘹唳誰知天外心

元豐類藁卷第三

元豐類藁卷第四

古詩

降龍

降龍左右施襟裾兩廊夾廟深渠渠禮下天子一等爾衣服居處何其殊文旂列戟照私第青紫苦若官其孥先後焚煌首珠翠侍者百十顏温瑜疑寒墮指熱侵骨一宴百盞傾金壺窮民疾首望雨露太上欲倚攀姚虞君胡為乎目時病案鍼撲艾恬以愉生前赫赫浪自重身後沒沒寧非愚

湘寇

衡湘有寇未誅勇殺氣凜凜圍江潯北兵居南匪便習

若以大船乘高峯僮人操兵快如鷲千里其旅巢深林
超突溪崖出又伏勢變不易施戈鐔能者張弓入城郭
連邑累鎮遭驅侵群黨爭誇殺吏士白骨棄野誰棺衾
糞糝殺萬直何用月費空已逾千金楚為貧鄉乃其素
應此調教寧能禁捷如馬援不得志強曳兩足登欽釜
烏蟻睚眦倚崑險此虜難勝端非今較然大體著方冊
唯用守長懷其心祝良張僑乃真選李瑒道古徒為擒
嗚呼廟堂不慎擇彼士齷齪何能任大中咸通乃商鑒
養以歲月其憂深願書此語致太史獻之以補丹宸箴

地動

吾聞元氣判為二升降相輔非相傷今者無端越疆畔
陰氣熖熖侵於陽陽收剛明避其勢陰負捷勝尤倡佯
地乘是氣抗於下震盪裂拆乖其常齊秦晉代及荆楚
千百其堵崩連牆隆丘錯屋不自定翩若猛吹搖旌幢
生民洶洶避無所如寄厥命於湖江有聲四出嘻可怕
誰擊萬鼓何雷礮陰為氣靜乃如此天意味密寧能詳
或云蚩夷尚侵軼已事豈必垂災祥意者邪臣有專恣
氣象翕翕難為當據經若此非臆決皎如秋日浮青霜
祖宗威靈陛下聖安得直語聞明堂朝廷肅穆法度治
豈用慄慄憂胡羌

遣將

太祖太宗能得人長壘橫邊戍虜塵太傅李漢超侍中

何繼筠二子追接吳與孫鎮齊撫棣功業均卓哉祖宗
信英特明如秋泉斷如石一朝出節合二子口付心隨
斷織感糜笄之勞郡城下酒利商租若山積二子開庫
啗戰士以屋量今剩量帛洪濤入坐行酒杯牛歲羊蒸
委若灰歲費巨萬不計籍戰士歡酣氣皆百二子按轡
行邊隅牙燾宛轉翻以舒汎掃沙磧無纖埃塞門千里
常夜開壯耕老舖安且愉桑麻蔽野華芬敷濟南遠清
書樂石百井夜出催窮廬神哉祖宗知大体趙任李牧
真如是漢文齷齪豈足稱郎吏致激面汗駢當今羗夷
久倡蹶兵如疽癰理須決堂堂諸公把旄鉞碩策神韜
困羈紲祖宗憲度存諸書炉若白日明天衢國容軍政

不可亂薦此以為

陛下娛

多雨

嗟江之濱地多雨冬雷不收開蟄戶陰氣濁晦化為霧
或雲於山水於礎雜花萬株紅與紫臘風吹開不可數
入春十日寒始至春氣欲歸寒格住群山巉空雪相亘
摧折草木何可禦霖傾潦洶那復止穹林大丘滅無渚
及今孟夏理宜熱重裘無溫坐當午四時云然了安謂
吁吾有愁誰可語

秋日

陰氣先羸縱秋熱時節有幾相與奪情知赫日不可久

須聽西風生木末浮雲滿天明復暗天意自然如慘怛
園林秀色已漸失次第豈能無葉脫南山獨佳不可挫
氣象更清連日月燕飛度海向何處今去昔來真可劣
綉簾錦幕不筆重從此朱門戒霜雪誰憐水角歌者哀
歲歲苦貧思短褐

山水屏

吳縑落寒機舒卷光亂日秋刀剪 新屏尺寸隨折曲
搜羅得珍匠徒倚思先屬經營頃刻內千里在一幅定
眎乃漸通紀一作數難迫促山亂若無窮負抱頗重複
高稜最當中桀大勢尤獨回環衆峯接趨向若奔伏矜
雄跨九州爭險挂星宿深疑雪霜積暗覺烟霧觸泉源

出青冥漲潦兩崖束歷遠始紆徐泓別輸衆谷輕舟漾
其間泐泐無緩速微尋得俯逕側起破蒼麓遠到無限
極窮升犯雲族遊子定何之顧盼停馬足盤石長自閑
空源偶誰築塵氛見荒林物色存古俗粲粲弄幽花蒼
蒼蔭嘉木遺牛上巖巖驚鹿出槎腹鮮明極萬狀指似
才一粟雖從人力為頗類陰恠續深堂得歇眠高枕生
遠矚餘光耀衾幃清意凝幔褥愚訶世幸略慵卧嗜尤
酷目能助佳夢肯顧躋杲旭將相有時材溪豈真我欲
儒林耻未博俗窳思自贖婚嫁累苟輕耕釣吾已卜圖
屏持自慰寤寐心思逐

八月二十九日小飲

陰陽在天地鼓吹猶橐籥煩蒸翕已盡灝氣乃浮薄群
山翠相抱塵靄如洗濯川源亦虛徹泓別婦衆壑囂音
滅蛙蚓勁意動雕鶚蠅蚊自不容雖有類鉗縛驅之舊
苦衆忽去寧匪樂俯仰自醒然意適忘體瘼天運雖已
晏生物固未剥薑芋圃可掘禾黍田始獲脫苞紫粟迸
透葉紅梨渥幽花媚清景鮮藜耀新萼西風動格露曉
愈脩摧能終犯寒法詎可忽纖弱况當九日近家釀成
已昨温頽几杖適弱質衣冠恪閨門自可會非必千里
約箏匏出人指邈迤奮宮角初言小人獻終拜長者酢
有言喜自洽細故憂可畧幸無職事顧况荷租賦薄讀
休暇得醉且吟嘍

食梨

今歲天旱甚百穀病已久山梨最大樹屬此亦乾朽當
春花盛時雪滿山前後常期摘秋實穰穰落吾手忽驚
冰玉敗不與膏澤偶清朝起周覽映葉才八九閑居問
時物此說得溪叟貧齋分寂絕塵抱徒噓嘔寧知蕭條
內把握忽先有食新恐非稱分少覺已厚開苞日呈動
落刃冰雪剖煙澗擇新汲遠負盈素生英華兩相發光
彩生戶牖初嘗蜜經齒久嚼泉垂口蠲煩慰諸親愈渴
忻衆交肯視故畦瓜寧論濁泥藕歲晚迫風霜人飢乏
藜糗真味雖暫御未許置樽酒

追租

耕耨筋力苦收刈田野樂鄉鄰約來往樽酒追酬酢生
涯給俯仰公欽忘厚薄胡為此歲暮老少顏色惡國用
有緩急時議廢量度內外奔氣勢上下窮割剥今歲九
夏旱赤日萬里灼陂湖感埃塏禾黍死硤确衆期必見
省理在非可畧謂須倒廩賑詎止追租閣吾人已迫切
此望亦迂邈奈何呻吟訴卒受鞭捶却寧論救憔悴反
與爭合龠問胡應驅迫久已罹匱涸計須實強壯勢不
存疴弱去歲已如此愁呼徧郊郭飢羸乞分寸斯須死
咎縛法令尚脩明此理可驚愕公卿飽天祿耳目知民
瘼恣令瘡痍內每肆誅求虐但憂值空虛寧無挺犁鏃
暴吏体宜除浮費義可削吾卧避囂喧茲言偶斟酌試

起望遺材霾風振墟落

桐封

棄地瓦礫間茲桐偶誰樹憶見擁西牆俄成劃烟霧得
時花葉鮮照影清泉助當軒蔽赤日對卧醒百慮惜哉
稟受弱妄使鸞鳳頤商聲動猶微秀色觸已沮泓摧亂
繁條逼迫畏清露暄晴幸未闕飄落儻可拒噫號衝飈
回激射陰霰聚此勢復可言瞪視空薄暮

九月九日

淒淒風露滋靡靡塵霑屏已忻廬舍清未苦裘褐冷眠
食味尤嘉起坐日尚未虛天照積水精鑑出幽礦石瑩
見山稜林疎覺惚罔黃花宿蕊破艷艷晨粧靚頰尋遠

逕香每愛蒼池影為誰佳色鮮慰我貧齋靜寒醅出家
法異果得他境甘腴饌新免醜恠薦修禳蒲益幽悶重
時節老大珍物景獻酬興未薄比諷思猶騁况同親戚
歡詎匪田野幸但醉任栖鴟燭炬尚可秉

路中對月

山川因遊人而不断歸夢其餘惟日月朝夕南北共日
光驅人身擾擾逐群動鄉思須暫忘世事那止重豈如
月可喜露坐惜倥惚清明入襟懷萬里絕纖霧愛之不
能餐但以目睛送想知吾在廬皎皎上脩棟慈親坐高
堂切切兒女衆憐其到吾前不使降惟懷豈不映時節
在薄更季仲而我去方急其能計歸鞚我非土木為耳

目異聾普念之曷由安腸胃百憂中何言月下喜喜意
亦有用為其同此時水木光可弄猶勝夢中事記之聊
一誦

聽鵲寄家人

鵲聲喳喳寧有知家人聽鵲占歸期物情固不等人事
爾意自驚思別離秋風粲粲正可愛黃菊芙蓉開滿枝
春風干剗變顏色遠水靜照紅霞衣梧桐楊柳豈知數
沙步露冷銀床歌新黃暗綠各自媚爛熳未減春風時
誰言秋物不可賞人意自移隨盛衰山田正冷酒味美
禾黍半收鷄鴈肥霜梨野栗處處有雪竅薦薦口清香隨
鄉園物物可想見我意祇隨魂夢飛家人未用占鵲語

應到歸時春亦歸

讀書亦云辛卯歲讀書

吾性雖嗜學年少不自強所至未及門安能望其堂在
苒歲云暮家事已獨當經營食衆口四方走遑遑一身
如飛雲遇風任飄揚山川浩無涯險恠靡不嘗落日號
虎豹吾未停車箱波濤動蛟龍吾方進舟航所勤半天
下所濟一毫芒最自憶往歲病軀久羸延呻吟千里外
蒼黃值親喪母弟各在遠計歸恐驚惶凶禍甘獨任危
形載孤艤崎驅護旅櫬緬邈投故鄉至今驚未定生還
乃非常憂慮心膽耗馳驅筋力傷况已近衰境而常犯
風霜驅之久如此負病固宜長朝晡暫一飽百回步空

廊未免廢坐卧其能眎縑緗新知固云少舊學亦已忘
百家異旨趣六經富文章其言既卓闊其義固荒茫古
人至白首搜窮敗肝腸僅名通一藝著書欲煌煌瓊底
自掩覆後世更昭彰世久無孔子指畫隨其方後生以
中才膏臆妄度量彼專猶未達吾慵復何望端憂類童
稚習書倒偏傍况今議文物規摹詎能詳輪轅孰挽直
冠蓋孰纁黃珪璋國之器孰殺孰鋒鋟問十九未諭其
一猶面牆幾微言性命萌北審興亡茲尤覺浩浩吾詎
免張張因思幸尚壯曷不自激昂前謀信已拙來效庶
云臧漸有田數畝春禾可耕桑休問就醫藥疾病可消
穰性本反澄澈情田去榛荒長編倚脩架大軸解深囊

收功畏奔景窺呈起幽房虛窓達深瞑明膏續飛光搜
窮力雖憊磨礪志須償譬如勤種藝無憂匱困倉又如
導涓涓寧難致湯湯昔廢漸開闢新輸日收藏經營但
疊疊積累自穰穰既多又須擇儲精棄其糠一正以孔
孟其揮乃韓莊賓朋頌空館議論據方床試為出其有
始如宮應商紛絃遇叩擊律呂乃交相湏史極萬變開
闔爭陰陽南山對塵埃相摩露青蒼百鳥聽徘徊忽如
來鳳凰乃知千載後坐可見虞唐施行雖未果貯蓄豈
非良何殊廐中馬縱齧草滿場形骸苟充實氣力易騰
驥此求苦未晚此志在堅剛

雜詩五首

三季已千載古道久荒榛紛紛東漢士飛鳴不當辰經
營救氛沴此志卒埃塵士生有進退何必棄其身其道
雖褊迫其行絕緇磷公心不吾誑復求無此人

貧仕任固小會計未可失方今備千品內外有甲秩孰
當責在已施設能自必拘文已難聘避世固多屈細云
且可略於大復何實所就正如斯與古豈同術雖非萬
鍾富苟冒歸一律焉能示朋交學士空自咄

韓公綴文辭筆力天乃授並驅六經中獨立千載後謂
為學可及不覺驚縮手如天有日月取耀無與偶當之
萬家榮所照百恠走此其自然光萬物安得有其人雖
已歿其氣著星斗窮天破大惑更覺功業以其餘施諸

小未負風義厚當身止自善所遇時則不致官九列齊
此理嗟亦苟去就惟用捨士固無常守孔孟非其稱斗
祿應未取惜哉天下才甘受外物誘

相去幾年今與古睚陽幾人朱與紫嗟哉二子獨有
名義烈乃能長不死當時美人歡未足一日蒼皇行萬
里豈無公卿尊且寵急反與胡為眼耳丈夫感激世莫
測二子引身高下起忠驅義激鬼神動漠漠胡沙來此
止

少年百事銳其謂身力孱心笑古時士樹立勢苦難差池歲月邁自照失
朱顏初心不復道齟齬常未安紛紛憂與勞幾不傷肺肝人自省
已分靜默固其端詩書可自喜施設諒漫漫

與舍弟別舟岸間相望感嘆成詩
涕淚昨辭親酸心今別子舟陸空相望摻袂即千里

戲呈休文屯田

陳侯雋拔人所羨歲晚江湖初識面已聞清論至更僕
更讀新詩欲焚硯天子無由熟姓名諸公固合思論
薦烏韉况已踏臺省黑綬未得辭州縣落落逢人愈難
合欣欣顧我能忘倦跬步鹿官別經歲角巾廣坐令相
見遶郭青山疊寒玉縈隈遠水鋪文練明紅靚白花千
對隔葉桃枝鬢百轉佳時苦雨已蕭索落蕊隨風還面
旋縱無供帳出郊野尚有清樽就間燕脫遺拍檢任真
率放恣嘲諧較豪健東廊解榻不共語明日離亭空春

春

送宣州杜都官

夜聞陵陽峯上雨曉見宛溪春水平畫船不待雙櫓挾
 歸客喜成千里行牧之文采宜未泯夫子風流今有聲
 篇什高吟鳳凰下翰墨醉洒煙雲生撥置簿書有餘力
 放意博壘無俗情志義非徒勸風俗愷悌固可交神明
 餘休比戶得涵泳豈訟累歲皆澄清薦章交論付丞相
 士行如此宜名鄉江湖一見十年舊談笑相逢肝膽傾
 鷓鴣一枝亦自得去矣黃鵠高飛鳴

麻姑山送南城尉羅君

麻姑之路摩青天蒼苔白石松風寒峭壁直上無攀援

懸磴十步九屈盤上有錦綉百頃之平田山中遺人耕
 紫烟又有白玉萬仞之飛泉噴崖直渴蛟龍淵豐堂廣
 殿何言言階脚插入斗牛間樛枝古木不記年空槎呀
 然臥道邊幽花自嬋娟林深為誰妍但見塵消境靜翔
 白鶴吟清猿鷓鴣禽乳鹿往往嗥荒顛却視來徑如緣絙
 千重萬疊窟巖岫下有荆吳粟粒之群山又有甌閩一
 髮之平川奕棊縱衡遠近布城郭魚鱗參差高下分岡
 原千竒萬異可意得墨筆盡禿誰能傳丈夫舒卷要宏
 達世路俯仰多拘牽偶未到此醒心目便欲洗耳辭囂
 喧羅夫子一日遠補東南官愛此層崖峻壑之秀發開
 軒把酒可縱觀喜此披霄插漢之巖起出門奉足得往

還羅夫子一尉龍蛇方屈蟠此邦人人衣食足闔境年
年抱鼓閑凡按剽裁得休暇山水登躡遺紛煩我行送
之思故園引領南望心長懸

東軒小飲呈坐中

二年委質繫官次一日偷眼看青山念隨薄祿困垂首
似見故人羞滿顏及門幸得二三友把酒能共頃刻閑
海魚腥醎聊復進野果酸澁誰能刪談劇清風生塵柄
氣酣落日解醉鑲瑰材壯志皆可喜自笑我拙何由攀
高情坐使鄙恪去病体頓覺神明還簡書皇皇奔走地
甕庫碌碌塵埃間功名難合若捕影日月遽易如循環
不如飲酒不知厭欲罷更起相牽扳

明妃曲二首

明妃未出漢宮時秀色傾人人不知何況一身辭漢地
驅令萬里嫁胡兒喧喧雜虜方始眼皎皎丹心欲語誰
延壽爾能私好惡令人不自保妍蚩丹青有迹尚如此
何況無形論是非窮通豈不各有命南北由來非爾爲
黃雲塞路鄉國遠鴻雁在天音信稀幾成新曲無人聽
彈向東風空淚垂若道人情無感慨何故衛女苦思歸
蛾眉絕世不可尋能使花羞在上林自信無由汙白玉向
人不肯用黃金一辭椒屋風塵遠去託擅廬沙磧深漢
姬尚自有妬色胡女豈能無忌心直欲論情通漢地獨
能將恨寄胡琴但取當時能託意不論何代有知音長

安美人誇富貴未央深殿競光陰豈知泯泯沈烟霧獨
有明妃傳至今

喜二第侍親將至

京師書多言六
弟為縣之美

嗟予懷抱徒蠢蠢二第曾中何落落政如魯衛各馳騁
文似機雲飽磨琢坐曹風義動江淮為縣聲名到京洛
鴻鴈戔戔並羽儀常棣韡韡聯跗鄂我於兩處抱饑渴
恨寄一官如束縛周南留滯勿復論平陸可來無厭數
慈親況不倦行役官長幸復寬期約似聞笑語已髣髴
想見追隨先踴躍共眠布被取溫暖同舉菜羹甘淡薄
山花得折隨好醜村酒可醉無清濁屈伸有命更勿疑
細故偶然皆可畧春風為子送帆檣速放船頭來此泊

七月一日休微作

初秋尚苦暑歸沐乃君息地閑少未客日晏猶閉門家
乏念藜藿開顏無一樽况復辭貌拙敢隨車馬奔盥濯
何所事讀書坐前軒豈堪當世用空味古人言頗喜市
朝內獨無塵土喧終年但如此真竊太官餐

秋夜

秋露隨節至霄零在幽篁灑氣入我牖蕭然衾篔簹涼念
往不能寐枕書嗟漏長平生肺腑友一訣餘空床况有
鵲巢德顧方共糟糠偕老遂不可輔賢真森茫家事成
獲落嬌兒亦徬徨晤言豈可接虛貌在中堂清淚昏我
眼沉憂回我腸誠知百無益思義故難忘

七月十四日韓持國直廬同觀山海經

高閣在清禁長軒憑廣虛御幄闕晷象依然臨幸餘翠
甍布天路黃簾分直廬一雨清景早稍涼秋興初辭帶
就君坐臨床闕素書山海所錯出飛潛類紛如此語果
虛實遺編空卷舒自笑正承亥更微注虫魚君材全遠
用就此固已踈如我乃斯幸地閑容誤居竹影散良席
花香浮廣裾俯仰自足適歸時更當徐

李氏素風堂

丞相事唐室獨馳三絕名家世在圖史詩書傳後生郎
位逮流澤出令儕輩驚歲暮營燕坐高居遺世情翠竹
帶書幌青山臨酒觥已使襟韻適况聞吟誦聲白可化
鄉里豈唯門戶榮果有過庭子穎然材思精抱璞已三
獻驚人當一鳴風義故常在茲堂非偶成

秋聲

喬柯與長谷秀色故未泯秋風來吹之聲如振江海怒
號無晨夕唱和若有待粲粲徧坳窪豈獨緣崑崙百川
亦相投取鬧不知悔竹籬更諠然呂律焉足采蜩蟬豈
知微切切如怨慙惟人亦吟哦沸若烹鼎鷗八荒同一
鳴靜裏安得在獨有虛空翁恬然故無改

戲書

家貧故不用籌筭官冷又能無外憂交遊斷絕正當尔
眠飯安穩餘何求君不見黃金滿箬囊要心計大印如斗

為身誰妻孥意氣賓客附往往主人先白頭

李節推亭子

盱江郭東門江水湛虛碧東南望群峯連延倚天壁長
林相蔽虧蒼翠浮日夕青冥窓戶寒居者非咫尺初
得從誰有此煙霧宅燕坐遠世喧及門無塵客築亭更
求深緩帶聊自適時花笑婀娜山鳥吟格磔家釀熟新
樽歡言命良席故已輕華簪寧論珍拱壁我亦有畝田
相望在阡陌安得巾柴車過從佇三益

秋夜露坐偶作

白雲飛尚低清露泫猶早風來亦依微濁暑焉得掃客
堂虛四楹洒水浪枯槁喜茲宵漏初露坐散襟抱河明
帶飛觀月白通馳道顧眄塵慮銷瓶泉謝頽側恨無同
聲人詩義與探討踟躇拂方床歸卧夢亦好

韓玉汝使歸

顧命逮殊隣輜軒遵北道公府戒行期禁庭頌重寶積
雪正東流度河盛前導士勇踐胡塵馬驕嘶塞草玉節
所鎮臨疆廬先汛掃苾爾示威靈坦然布懷抱國倚材
實優虜得聲名早慷慨服天驕從容問遺老光華反原
隍沉礪看西顛迎勞動都門旌旗風亦好

苦熱

憶初中伏時佛鬱炎氣升赫日已照灼赤雲助軒騰積
水殆將沸清風豈能興草木恐焚燎窓扉似炊蒸冰雪

氣已奪蚊蠅勢相矜發狂憂不免暑飲詎復勝

過介甫

日暮驅馬去停鑣叩君門頗諳肺肝盡不聞可否言淡
爾非外樂恬然志世喧况值秋節應清風蕩歎煩徘徊
至星漢更復坐前軒

過介甫歸偶成

結交謂無嫌忠告期有補直道詎非難盡言竟多迂知
者尚復然悠悠誰可語

合醬作

孺人捨我亡稚子未堪役家居拙經營生理見侵迫海
鹽從私求厨麪自官得棟豆連熬晨汲泉候將夕調撓

遵古書煎熬需日力庶以具藜藿故將供膾食豈有寄
徑憂提瓶無所適但慙著書非覆瓿固其職

送章發州

方排使君節駕言自東還又聞白丞相懷紱出九關遂
縱大船去欲追詎能攀已喜所寄徑幽尋足谿山仍誇
越西部迥在雲林間屋瓦徧高下青蒼更回環穿路竹
裊裊鳴沙水潺潺會有樽酒適每需庭訟閒况席鼓琴
舊政行故非艱歲暮當趨召馳歸復玉班

瞿叔校新授官還南豐

柳色映馳道水聲通御溝雖喜芳物盛未同故人遊叩
門忽去我躍馬振輕裘佩印自茲始過家當少留中園

何時到薇蕨亦已柔山翠入幽屐渚香浮迥舟阡陌有
還往壺觴時獻鼎應笑天祿閣寂寥誰見求

元豐類藁卷第四



